

QUÆSTIO MEDICA.

Quodlibetariis disputationibus manè discutienda in Scholis Medicorum, die Jovis 20 mensis Februarii 1716.

M. JOANNE BAPTISTA DODART,
Serenissimæ Principissæ Dotariæ de Conty Medico
Ordinario; Serenissimi Dêlphini, dùm viveret,
Medico; Præsîde.

An præcavendis senum morbis, victûs rationi venæ sectio, ut plurimum, sit consocianda.

I

MAGNAM molestiarum partem facîle declinaremus, & fatum quod juvenibus in propinquo, senibus in limine est, ante diem non obreperet; si tantùm in præcavendis morbis, quantùm in iis, dùm nos exerceat, profligandis, operæ poneremus. Amissam tamen sanitatem, ut ægrè recuperare, sic præsentem facîle retinere & adducere ad extremam usque ætatem licebit; si in victûs ratione, quos errores feceris, pensare auxiliis Medicis & præsertim venæ sectione interdùm repetitâ cures: morbos enim Medicinæ ope præcaveri ita constat, ut certior nulla sit pars artis Medicæ, quàm ea quæ sanitati regulam ponit. Pessimè nobiscum ageretur, si morborum impendentium nulla præcederet significatio & præmonitio. Vix unquam in morbum, nisi nostrâ negligentia vel intemperantia incidimus; & ut apud parentes, semper bonam valetudinem contigisse liceret; si nos neque mores, neque desidia, neque luxuria vitiaissent. Indè Arthritis; Rheumatismus, Apoplexia, Histerici affectus; catarrhi, etiam colicus dolor, & plurimi affectus apud Aulicos, Magnates, tam familiares, apud veteres aut ignoti, aut minùs cogniti, apud rusticos & qui durè vitam agunt, tam infrequentes: Et quod magis notandum, ipsa sanitas athletica etiam aliquandò, nisi sanitatis dispendio conservari non potest; quam solvendam haud cunctanter consulit Hippocrates vasorum evacuatione, id est venæ sectione. At si præcavere morbos tam sit utile in omni ætate, quàm potiori jure senectute adveniente! quo tempore, moram cum trahant humores, crudior sit chylus, sanguis viscidior, partes solidæ minùs sint flexiles, morem non gerant, seu potius duriùs imperent humoribus, innumeris calamitatibus senes sunt expositi.

II.

QUOS longa series annorum artibus, disciplinis, vel rerum multiplici usu & experientia magis exornavit, hæc eorum corpora non medio-

eriter debilitasse certissimum. In juventute fervidior atque spiritibus turgens sanguis, vasa mollia ex quorum contextu tota compages corporis constat, vel exilissima facile præterfluit: At sub senectute, quæ ipsa morbus & tabis genus est, partes dureſcunt, & de elaterio perdunt à sua flexibilitate desciscunt: undè contractionibus & excretionibus obeundis impares stagnant humores, crassescunt, perturbato, impedito, cessante quadamtenus eo motu, eâ secretionem, quorum perennitate & æquilibrio, sanitas vigeat. Quanta indè senem circumveniunt incommoda? tentatur caput vertigine, quæ ut præit, morbum attonitum, ita hic, si solvatur, in Paralyſim definit; hebescent sensus. Thoracem quatit prava & in senectute vix sanabilis tussis. Pulmo viscus sanguisorbium subigendi, terendique chili instrumentum, elaterio imminuto difficilius contrahitur; nec satis expresso crudo, viscido, tenaci nimis sanguine, peripneumonia, pleuritide, asthma tentatur. Renes senum calculus, vesicam dysuria, artus diatesis Rheumatodes, articulos lapidosa chiragra nodosa, podagra vexant. Si cruor viscidior ventriculi alimentis infarcti vitio interceptus concreverit, cardiacâ syncope momento suffocatur. Etiam gelidus sanguis cutem urit pruritu & malignâ impetigine. Quamplurimis ob vitia adolescentiæ patet affectibus. Indè Febres Quartanæ, Cachexia, Hydrops; si morbos numeres, innumeris expositus incommodis; si causam perquiras? sanguis lentè mobilis, tardius fluens, succorum tenax, secretioni impar, in angustias viscerum impingens, diuturnis morbis ansam præbet. Idem ipse immutato motu circulationis, inter moras intestino motu incandescens, ignem latè spargit; & sic Febribus tumultuosis, acutis morbis, inflammationibus viscerum ansam præbet.

III.

QUANTUM valeat ad morborum medelam victus ratio, celsò Hippocratis Interpreti fides adhibenda. Delineatis fere omnibus morbis, ceteros quos manus tractat enarraturus; dixi, inquit, de *de his quos victus ratio maxime curat*. Quantum autem valeat ad præcavenda vitia corporis explicat satis sequentibus verbis: *Verisimile est primis temporibus, inter nonnulla auxilia adversa valetudinis plerumque eam bonam contigisse, ob bonos mores quos neque desidia, neque luxuria vitiant, quos neque inquieta cogitatio, nec nocturna vigilia minuerant*. Et certè plerumque pessimo victus genere sanitati decoquimus. Quem blandæ voluptatis illecebræ aliquandò non irretiunt; ad omnem ictum nos exponit innata imbecillitas. Frigore, æstu, labore, offendimur; sed ut plurimum potu & alimentorum copiâ rumpimur. Vis esse beatus? ad cibum & potum, ut vitæ, sic mortis viaticum, non tanquam ad vas implendum, accede: sic alimentorum temperantiâ, plus quàm eorum usu vitam perages. Exiguum desiderat ventriculus, immensum opinio. Qui sobriè degit, nec causarias habet partes, tam vacat omni morbo, quàm humorum cœno. Frigus, æstus, externarum causarum vis, aer etiam pestiferus languescet, ubi nil adjuvabunt inquilini hostes. Eâ victus ratione simplici, ut morum innocentiam, sic vitam iucundam tuebantur Cœnobitæ, ipso anno centesimo sani. Verùm ut ætas parentum pejor avis tulit nos nequiores, imbecilla jam tractari mollius vult, adeoque nostræ obsequimur intemperantiæ, ut eam excusare potius quàm excutere malimus. Non itaque mirum, si victus ratione ubique terrarum obliteratâ, tam ad morbos depellendos, quàm ad sanitatis tutelam,

ad Medica auxilia, præsertim ad ea quæ superflua detrahunt, & interplurima, præter cætera, ad venæ sectionem, tanquam ad sacram anchoram sit confugiendum.

IV.

QUANDOQUIDEM ad omnes corporis functiones obeundas faciunt maximè Fluxiles succi, flexiles tubuli, deficiente eorum consensu, quanti, quæso, æstimaveris venæ sectionem, quæ præter cætera auxilia Medicæ artis conciliare potest solida cum fluidis? A sanguinis detractione laxatis fibris, remisso vasorum elatere, eorum flexilitate restitutâ, par ubique speranda veniet sanguinis, humorum, spirituum fluxilitas. Et certè ejus ope cuncta ad fluendum paratiora quis non animadvertat, ut vel sub ipsâ sanguinis detractione sæpè sponte solvatur alvuus, bonis ægri rebus, sæpè sudores profluant, urina liberius evehatur, & crisi salutari morbus solvatur? Venæ sectionem cæterarum evacuationum vicem supplere autor est Hippocrates. Exuperantis sanguinis redundantiam, senibus, præsertim iis qui lautè vivunt, frequentem, & maximè metuendam, momento tollet. Tubis vasorum extrâ metas distentis vitio virtutis elasticæ, tonum restituet; facili alveo fluidior factus cruor, fluet liberius, sequetur secretio secunda sanitatis assertrix; & ad Catharsim, quæ opus est majoris prudentiæ, felix præparatio. At incommoda, quæ venæ sectionem sequuntur, si animo revolvas; vix ulla: cùm sanguinis reproductio difficilis non sit, nec novus veteri deterior. Nec superfluum, nec suspectum erit viribus integris, vel oppressis, quod sæpè sæpius, non exolutis, quod rarò admodum contingit, venam tundere. Quis te malus genius agit, Hæmophobe, ut quasi anima in empedocleo sanguine mersa foret, cum ipso vitam minui putes? Illi seni melius consultum credas, qui curet vitam dicto modo, cum minori periculo & dolore producere, renovato interdùm sanguine, quod superfluum est detracto; quàm illi qui errore & falso terrore seductus, imprudenter sinit ob nimiam sanguinis copiam vitam extinguere ac suffocari; ignarus senibus plus esse virium in consiciendo sanguine ad alendum corpus in singulos dies, quàm in expellendo & corrigendo inutili, quo corpus non alitur, sed gravatur & affligitur, suppressis excretionibus ad depurationem sanguinis tam necessariis, & præsertim transpiratione imminutâ, cujus ope, non tantùm inertes humores, excrementitii succi, sed alimentorum, ut sanguinis maxima pars, in auras abit. Non itaque annos numeras. *Antiqui inquit Celsus, primam ultimamque ætatem sustinere non posse hoc genus remedium judicabant; sed interest non quæ sit ætas, sed quæ vires sint. Firmus puer & robustus senex tunc vana sectionem ferunt. Tardum itaque dictum an venæ sectio juvet senes, eorum consulat sanitati, tutius an citius, imò & jucundius.*

IV.

QUOTIDIANO corporis defectui, qui naturalis quidem ac certè gravis est morbus, verius quædam senectutis prolixitas, non aliter mederi potest homo, quàm si potûs, cibi que adminiculo sariat quidquid illius succo continenter decedit; senes quos jam destituit ventriculi tonus, fermentorum activitas, sanguinis & humorum fluor, transpirationis assidue effluvium, quo propius ad vitæ terminum accedunt, his vita paucioribus, coctis facilioribus alimentis est sustinenda. At ut vix quisquam qualem debet servare victûs rationem potest, aut ob negotiorum molem,

aut eorum quæ agenda sunt ad sanitatem ignorantiam, aut ob negligentiam, aut ob intemperantiam, hos intactos morbis perdurare impossibile erit in senectâ, in qua velut ætatis hyeme, plurimorum morborum procellæ præstò sunt, nisi quod deficit in victûs ratione, sectione venæ suppleas. Præsidium nihilominus haud trahendum in consuetudinem, minimè propter consuetudinem, religiose certo tempore repetendum; sed interdum celebrandum, præsertim si lautè vivat senex, si pleniori sit habitu, si suppressus sit Hæmorrhoidum fluor, si quod ferè semper contingit, ab oppressis, non exolutis viribus morbus immineat. Sic caput à Vertigine, Apoplexia, Lethargo, in somniculosâ senectute vindicabis; sic suppressas Hæmorrhoides, Arthritidem sæpius criticam revocabis; sic bonum habitum, senibus sæpius lethalem, senis mentem sequutus, solves haud cunctanter, quo rursus initium novæ nutritionis corpus sumat; sic in Plethoricis, Catarrho suffocante à sanguine stagnante, vel etiam à Saburra in ventriculo occurrere licebit; sic inflammatorios morbos quos parit inertia humorum, & eorum intestinus motus, præcavebis; sic licebit in plerisque Prophylaxeos scopum attingere, morbumque imminentem propulsare: Nec senectus quidem quæ solvit & frangit omnia, importuna erit; corpus solidum, succique plenum, omnibus functionibus obeundis par videbitur. Puro lumine, quidquid contrà Hæmophobi obgarriant, vigeunt oculi, & hac ratione floridior continget nulli non optata senectus: Quòd si tandem eò venerit ætas, quò vel cunctantibus veniendum, quò satietas vitæ tempus maturum morti affert, tam placidè è vivis excedet, ut obdormire, non emori videatur.

Ergò præcavendis senum morbis, vitæ rationi, vena scellio, ut plurimum, consocianda.

Domini Doctores Disputaturi.

M. Petrus Afforty.

M. Michael Ludovicus
Reneaume de la Garenne,
Regia Scientiarum Aca-
demia Socius.

M. Michael Pichonnat.

M. Franciscus Aignan.

M. Raymundus - Jacobus
Finot, Chirurgia Professor.

M. Franciscus Picoté de
Belestre.

M. Jacobus Fourneau.

M. Philippus Bernardus
de Bordegaraye.

M. Joannes Daval.

Proponebat Parisiis JOANNES-DAMIANUS CHEVALIER,
Andegavenſis, Baccalaureus Medicus, A. R. S. H. 1716.